

UPUTSTVO ZA POSTUPANJE I ORGANIZIRANJE  
SASTANAKA REGIONALNIH MONITORING TIMOVA –  
UŽI TIMOVI

## UVOD

Imajući u vidu nadležnosti i uloge institucija na svim nivoima vlasti u BiH te nevladinih organizacija aktivnih u borbi protiv trgovine ljudima, a u cilju daljeg razvijanja institucionalnih kapaciteta za provođenje pravnog okvira i pružanje adekvatne pomoći i zaštite žrtvama trgovine, u skladu sa članom 22. Pravila o zaštiti žrtava i svjedoka žrtava trgovine ljudima državljana Bosne i Hercegovine, uspostavljeni su regionalni monitoring timovi: Sarajevo; Mostar; Banja Luka; i Tuzla. Osnovni zadatak ovih timova je da u skladu sa individualnim potrebama svake žrtve izrade programe zaštite i upućivanja žrtava i žrtava svjedoka, i osiguraju svu neophodnu pomoć i zaštitu žrtvama kroz efikasno provođenje individualnih programa za oporavak žrtava trgovine ljudima. Pri svom djelovanju, regionalni monitoring timovi postupaju u skladu sa principima i zajedničkim standardima rada koji se odnose na postupak identifikacije, organiziranja zaštite i pomoći, primarne i sekundarne prevencije i ostalih aktivnosti na zaštiti i pomoći žrtvama trgovine i svjedocima žrtvama u BiH koji su utvrđeni *Pravilima o zaštiti žrtava i svjedoka žrtava trgovine ljudima državljana Bosne i Hercegovine* i *Pravilnikom o zaštiti stranaca žrtava trgovine ljudima*.

Istovremeno Operativnim planom za provođenje Državnog akcionog plana za borbu protiv trgovine ljudima u Bosni i Hercegovini 2008-2012, a u okviru Cilja 1. (Institucionalna koordinacija), utvrđena je obaveza da je neophodno "...poboljšati koordinaciju aktivnosti nadležnih institucija na državnom, entitetskom, kantonalnom nivou i Brčko Distriktu BiH, kao i koordinaciju sa nevladinim i međunarodnim organizacijama". Radi realizacije ove obaveze u okviru Mjere 2., utvrđena je obaveza "...uspostave regionalnih radnih grupa sa ciljem koordiniranja, monitoringa i provođenja aktivnosti na sprečavanju trgovine ljudima na lokalnom nivou".

### **Svrha i način uspostave regionalnih timova**

**Svrha** regionalnih monitoring timova (RMT) je uspostavljanje dodatnih kapaciteta za poboljšanje funkcionalnih veza između nadležnih organa vlasti i nevladinih organizacija u BiH koje učestvuju u provođenju aktivnosti na suzbijanju i sprečavanju trgovine ljudima. Institucionaliziranje međusobnih veza i saradnje svih subjekata, posebno onih koji djeluju na regionalnom i lokalnom nivou, neophodno je imajući u vidu činjenicu da su žrtve trgovine ljudima pripadnici regionalnih i lokalnih zajednica gdje skoro isključivo ostvaruju sva svoja prava i obaveze. Stoga, plansko i usklađeno djelovanje regionalnih i lokalnih institucija i organizacija je neophodno da bi se unaprijedio sistem identifikacije žrtava i osigurala njihova odgovarajuća rehabilitacija, reintegracija i resocijalizacija, te da bi se djelovalo preventivno na uzroke koji dovode do viktimizacije i reviktimizacije žrtava trgovine ljudima. Kroz djelovanje na regionalnom i lokalnom nivou u velikoj mjeri će se utjecati i na dostizanje odgovarajućih standarda u zaštiti žrtava te utjecati na provođenje aktivnosti i postizanje ciljeva Akcionog plana za borbu protiv trgovine ljudima u Bosni i Hercegovini.

**Zadaci** RMT-a su da kroz plansko i usklađeno djelovanje doprinesu efikasnosti borbe protiv trgovine ljudima provodeći sljedeće aktivnosti:

- Prikupljanje i analiziranje informacija o trendovima trgovine ljudima na svojim područjima i vršenju stalne procjene adekvatnosti pravnog okvira, institucionalnog okvira, ljudskih i drugih kapaciteta za adekvatan odgovor na problem
- Provođenje istraga i aktivnosti vezanih za borbu protiv trgovine ljudima u BiH. Ove istražne inicijative će biti vođene od strane SIPA-e uz podršku agencija uključujući Graničnu Policiju, Službu za poslove sa strancima i druge.
- Razvijanje kapaciteta institucija i organizacija uključenih u aktivnosti borbe protiv trgovine ljudima, naročito u postupcima identifikacije žrtava trgovine ljudima sa posebnim osvrtom na ranjive kategorije
- Provođenje preventivnih aktivnosti usmjerenih na smanjenje rizika za viktimizaciju i reviktimizaciju žrtava
- Planiranje i poduzimanje koordiniranih aktivnosti u kreiranju individualnih programa rehabilitacije, reintegracije i resocijalizacije identificiranih potencijalnih žrtava trgovine ljudima, te zajedničko provođenje takvih programa

**Način uspostave** je zasnovan na teritorijalnoj organizaciji Državne agencije za istrage i zaštitu (SIPA), što je i propisano članom 22. Pravila o zaštiti žrtava i svjedoka žrtava trgovine ljudima državljana Bosne i Hercegovine. Ovakav način organiziranja RMT-a ničim ne utječe na stvarnu i mjesnu nadležnost svih uključenih institucija i organizacija, već za isključivi cilj ima njihovo međusobno umrežavanje te razmjenu informacija, planiranje i provođenje aktivnosti. U skladu sa naprijed navedenim, uspostavljena su četiri regionalna monitoring tima, i to: Sarajevo; Mostar; Banja Luka; i Tuzla.

### **Sastav regionalnih monitoring timova**

Osnovni princip u organizaciji RMT-a jeste zastupljenost svih organa vlasti i nevladinih institucija i organizacija koje u svojoj nadležnosti i ovlaštenjima imaju poduzimanje aktivnosti koje su u direktnoj ili indirektnoj vezi sa borbom protiv trgovine ljudima, bilo da se radi o krivičnom gonjenju trgovaca ljudima, zaštiti i pomoći za žrtve trgovine ljudima ili poduzimanju preventivnih mjera na suzbijanju trgovine ljudima. U RMT su zastupljene institucije sa svih nivoa vlasti: državnog, entitetskog, kantonalnog i općinskog te nevladine organizacije koje djeluju na nivou države ili na drugom nivou. Sastav RMT-a i njihov rad zasnovan je na interesornoj, međusektorskoj i teritorijalnoj zastupljenosti uključenih institucija i organizacija.

U sastav RMT-a su uključene sljedeće nadležne institucije, agencije za provođenje zakona i nevladine organizacije:

- Sa nivoa Bosne i Hercegovine: Ministarstvo sigurnosti, Ministarstvo za ljudska prava i izbjeglice, Ministarstvo pravde, Ministarstvo civilnih poslova, Agencija za ravnopravnost spolova, Tužilaštvo BiH, Državna agencija za istrage i zaštitu, Granična policija, Služba za poslove sa strancima, te predstavnici ostalih institucija sa kojima će se u narednom periodu dopunjavati regionalni monitoring timovi a u skladu sa zaključcima sa održanih sastanaka u proteklom periodu

- Sa nivoa entiteta, kantona i Brčko Distrikta BiH: entitetska tužilaštva i Tužilaštvo Brčko Distrikta BiH, te kantonalna tužilaštva; entitetska ministarstva pravde; entitetska i kantonalna ministarstva unutrašnjih poslova i Policija Brčko Distrikta BiH; entitetska i kantonalna ministarstva nadležna za rad i socijalnu politiku, zdravstvenu zaštitu, obrazovanje, te predstavnici ostalih entitetskih i/ili kantonalnih institucija sa kojima će se u narednom periodu dopunjavati regionalni monitoring timovi a u skladu sa zaključcima sa održanih sastanaka u proteklom periodu. Treba napomenuti da je učešće entitetskih i kantonalnih institucija veoma važno. Pored aktivnosti na istraživanju i gonjenju krivičnog djela trgovine ljudima, te institucije imaju i isključivu nadležnost za krivična djela koja se dovode u vezu sa trgovinom ljudima, a koja su propisana u entitetskim krivičnim zakonima i Krivičnom zakonu Brčko Distrikta BiH (trgovine ljudima radi vršenja prostitucije, navođenja na prostituciju, iskorištavanje djece i maloljetnih osoba za pornografiju, te proizvodnju i prikazivanje dječije pornografije/upoznavanje djeteta sa pornografijom).
- Sa nivoa općina obavezno se uključuju predstavnici centara ili službi za socijalni rad.
- U sastav RMT-a su uključene nevladine organizacije koje imaju odgovarajuće kapacitete za pružanje direktne asistencije žrtvama i svjedocima žrtvama trgovine ljudima, te kapacitete za provođenje preventivnih aktivnosti.
- Sastancima i u radu regionalnih monitoring timova mogu prisustvovati odnosno uključivati se međunarodne orgnaizacije koje u svom mandatu imaju aktivnosti borbe protiv trgovine ljudima u svojstvu promatrača.

Regionalni monitoring timovi su organizirani na sljedeći način:

- Za svaki RMT uspostavlja se uži i širi sastav tima.
- Uži sastav RMT čine predstavnici nadležne regionalne kancelarije SIPA-e, Granične policije, Službe za poslove sa strancima, entitetskog ministarstva unutaršnjih poslova, nadležnog tužilaštva, predstavnika nadležnih ministarstava rada i socijalne politike i/ili centra za socijalni rad, obrazovanja, zdravstva i nevladinog sektora. Sastav užeg tima je takav da se osigurava ravnomjerna zastupljenost svih relevantnih i uključenih institucija radi osiguravanja multisektorskog pristupa, odnosno ravnomjerne zastupljenosti svih sektora koji učestvuju u provođenju aktivnosti.
- Širi tim čine ostali imenovani predstavnici svih institucija i organizacija koje imaju nadležnost i ovlaštenja na području koje pokriva RMT.
- RMT koordinira predstavnik Ministarstva sigurnosti BiH/Odsjeka za borbu protiv trgovine ljudima, u saradnji sa predstavnikom regionalnog ureda SIPA-e, koji obavljaju i administrativne i logističke poslove vezane za rad užeg i šireg tima. Sastanke koje koordinira Ministarstvo sigurnosti BiH/Odsjek za borbu protiv trgovine ljudima održavaju se periodično, odnosno tromjesečno, dok se sastanci užeg dijela RMT održavaju svaki mjesec, a koordinira ih predstavnik Regionalne kancelarije SIPA-e koji je nadležan za određenu regiju djelovanja tima.

## **Aktivnosti regionalnih monitoring timova**

Aktivnosti RMT-a su podijeljene na dva dijela. Prvi dio čini planiranje i poduzimanje koordiniranih aktivnosti u kreiranju individualnih programa rehabilitacije, reintegracije i resocijalizacije identificiranih potencijalnih žrtava trgovine ljudima, te zajedničko provođenje takvih programa, odnosno aktivnosti na direktnoj asistenciji žrtvama. Drugi dio čine aktivnosti na prikupljanju i analizi informacija o trendovima trgovine ljudima na svojim područjima; na vršenju stalne procjene adekvatnosti pravnog i institucionalnog okvira, ljudskih i drugih kapaciteta za adekvatan odgovor na problem; na razvijanju kapaciteta uključenih institucija i organizacija za borbu protiv trgovine ljudima; i provođenje preventivnih aktivnosti na smanjenju rizika za viktimizaciju i reviktimizaciju žrtava, odnosno aktivnosti na provođenju Državnog akcionog plana za borbu protiv trgovine ljudima.

### **- Aktivnosti na direktnoj asistenciji žrtvama trgovine ljudima**

Organi vlasti i ovlaštene organizacije koje sačinjavaju RMT dužni su da razmjenjuju sve raspoložive informacije o identificiranim potencijalnim žrtvama i svjedocima žrtvama radi pružanja pomoći i zaštite, prikupljanja statističkih podataka, izrade odgovarajućih izvještaja i informacija i drugih potreba od značaja za rješavanje slučajeva trgovine ljudima. Razmjena informacija čini osnovu za razvijanje funkcionalnih veza između uključenih institucija, a sve u cilju izrade i provođenja odgovarajućih programa zaštite i upućivanja žrtava i svjedoka žrtava trgovine ljudima.<sup>1</sup>

---

<sup>1</sup> Pravila o zaštiti žrtava i svjedoka žrtava trgovanja ljudima državljana Bosne i Hercegovine ("Službeni glasnik BiH", broj 66/07), član 5. (Pravila razmjene)

(1) Nadležne institucije u BiH i ovlaštene organizacije u skladu sa ovim Pravilima obavezne su da razmjenjuju sve raspoložive informacije o žrtvama i svjedocima žrtvama radi pružanja pomoći i zaštite, prikupljanja statističkih podataka, izrade odgovarajućih izvještaja i informacija i drugih potreba koje su od značaja za rješavanje slučajeva trgovine ljudima u Bosni i Hercegovini.

(2) Istovremeno su sve nadležne institucije u BiH i ovlaštene organizacije obavezne dostavljati povratne informacije vezane za rješavani predmet trgovine ljudima.

(3) Sve institucije u BiH, organizacije, pravna i fizička lica koji na bilo koji način dođu u dodir sa djetetom koje je izloženo nekom od oblika eksploatacije i nasilja dužni su, bez odlaganja, organu starateljstva dostaviti obavijest o povredi prava djeteta.

(4) Obaveza dostavljanja obavijesti o povredi prava djeteta službi ili centru za socijalni rad odnosi se na Tužilaštvo BiH, tužilaštva entiteta i Brčko Distrikta BiH, policijske službe u BiH i stručne radnike u obrazovno-vaspitnim institucijama (upravu, nastavnike i pedagošku službu obrazovnih ustanova), zdravstvenim ustanovama, inspekcijским i sanitarnim službama, zavodima za zapošljavanje, matičnim uredima, savjetovalištim, zavodima za zaštitu djece i omladine, domovima za nezbrinutu djecu i omladinu kao i djecu bez roditeljskog staranja i bilo kojim drugim javnim ili privatnim institucijama u kojim se djeca zbrinjavaju.

(5) Ukoliko je u pitanju punoljetna žrtva i svjedok žrtva, nadležno tužilaštvo ili policijska služba informiraju službu ili centar za socijalni rad, samo uz pristanak žrtve i svjedoka žrtve.

(6) Ukoliko Ministarstvo vanjskih poslova putem diplomatsko-konzularnih predstavništava (u daljem tekstu: DKP) u okviru svojih redovnih aktivnosti dođe do saznanja da se na njegovom jurisdikcijskom području nalazi dijete ili punoljetna žrtva i svjedok žrtva trgovine ljudima, a državljanin je Bosne i Hercegovine, ili utvrde da okolnosti koje su u vezi sa djetetom ili punoljetnom osobom upućuju na to da se ove osobe eksploatiraju, dostavit će informaciju nadležnom tužilaštvu ili policijskoj službi putem nadležnog sektora Ministarstva vanjskih poslova. DKP će intenzivno saradivati sa nadležnim službama zemlje domaćina u cilju prikupljanja podataka o okolnostima svakog pojedinog slučaja.

S obzirom da su u sastav RMT-a uključene institucije i organizacije koje mogu imati saznanje ili osnov sumnje o potencijalnim žrtvama ili svjedocima žrtvama trgovine ljudima ili su one već identificirane, zavisno od situacije se razmjenjuju informacije i iskustva o načinu vođenja ovakvih slučajeva. Ove informacije se razmjenjuju isključivo u cilju izrade programa zaštite i upućivanja žrtava i svjedoka žrtava trgovine ljudima (ovdje se ne govori o operativnim aktivnostima koje su u nadležnosti tužilaštava i policije).

Osnovni cilj koji se postiže uspostavom RMT sadržan je u razvijanju sistema funkcionalnih veza između nadležnih institucija i ličnih veza pojedinaca uključenih u regionalni tim. Funkcionalne veze između nadležnih institucija ogledaju se u definiranju standardnih procedura, vrsti i sadržaju informacija koje se razmjenjuju, te načinu na koje se realiziraju ove aktivnosti.

Kada postoji potreba da se kreira i provede individualni program rehabilitacije, reintegracije i resocijalizacije za potencijalnu ili identificiranu žrtvu, članovi RMT će oformiti stručni tim sačinjen od predstavnika institucija i organizacija koje su nadležne za poduzimanje pojedinih radnji u vezi sa žrtvom, kako bi razmijenili podatke o konkretnom slučaju, zajednički ga procijenili, definirali individualni program rehabilitacije, reintegracije i resocijalizacije te ga zajednički provodili.

Detaljna uputstva o svim potrebnim aktivnostima vezanim za postupak identifikacije, odnosno otkrivanja žrtve trgovine ljudima, prijavljivanja, procjene slučaja i mjera na zaštitu i pomoći žrtvi, razmjenu informacija i saradnju između institucija i organizacija data su u posebnoj dijelu Smjernica za svaku od institucija, odnosno organizacija posebno.

## **Organiziranje sastanka RMT**

**Ministarstvo sigurnosti BiH Odsjek za borbu protiv trgovine ljudima koordinirati odnosno organizirati će sastanke regionalnih monitoring timova periodično (tromjesečno), te u skladu sa finansijskim mogućnostima pozivati će članove užeg i/ili šireg tima. Ovi sastanci će se održavati u regionalnim kancelarijama SIPA-e, a po potrebi moguće ih je organizirati u nekom drugom prostoru, prilagođenom/adekvatnom u tu ili toj svrhu/si.**

**Za organiziranje ovih sastanaka pozivi će biti upućivani od strane Odsjeka za borbu protiv trgovine ljudima, a po održavanju istih dostavljati će se zaključci/preporuke članovima regionalnih monitoring timova. U svrhu blagovremenog dostavljanja informacija i zaključaka o planiranim/organiziranim aktivnostima Odsjek za borbu protiv trgovine ljudima će dostavljati članovima užeg tima, a koji će u skladu sa nadležnostima institucija uključenih u rad regionalnih monitoring timova distribuirati ostalim imenovanim predstavnicima. U cilju unapređenja saradnje svih članova timova i Odsjeka, potrebno je ažurirati ranije pripremljene adresare (šeme RMT) i dostaviti ih članovima tima. Istovremeno potrebno je sve eventualne izmjene i dopune kontakt detalja imenovanih predstavnika u što kraćem roku dostaviti Odsjeku, a predstavnik Odsjeka će o tome izvjestiti imenovanog predstavnika regionalne kancelarije SIPA-e kako bi se eventualna informacija/izmjena prosljedila ostalim predstavnicima/članovima timova. U ranije**

---

(7) Ukoliko je u pitanju punoljetna žrtva i svjedok žrtva, nadležne institucije i ovlaštene organizacije informiraju tužilaštvo ili policijsku službu bez obzira na pristanak žrtve i svjedoka žrtve.

**dostavljene adresare (šeme RMT) potrebno je unijeti e-mail adrese imenovanih predstavnika u cilju unapređenja saradnje i koordinacije.**

### **Organiziranje sastanaka užeg tima RMT**

Kako je ranije navedeno, a u skladu sa načinom formiranja i djelovanjem regionalnih monitoring timova uspostavljeni se uži i širi sastavi timova, za svaki tim posebno.

Uži sastav RMT čine predstavnici nadležne regionalne kancelarije SIPA-e, Granične policije, Službe za poslove sa strancima, entitetskog ministarstva unutrašnjih poslova, nadležnog tužilaštva, predstavnika nadležnih ministarstava rada i socijalne politike i/ili centra za socijalni rad, obrazovanja, zdravstva i nevladinog sektora.

U skladu sa prijedlozima i dogovorima sa ranije održanih sastanka, donesen je i prihvaćen zaključak da se uži sastavi timova sastaju jednom mjesečno, a u koordinaciji imenovanog predstavnika nadležne regionalne kancelarije SIPA-e.

Na ovaj sastanak imenovani predstavnik regionalne kancelarije poziva članove užeg tima, a po potrebi i u zavisnosti od konkretnog slučaja direktne asistencije potencijalnoj i/ili identifikovanoj žrtvi trgovine ljudima, pozivaju se predstavnici institucija i/ili ovlaštenih organizacija koji učestvuju tj obezbjeđuju pomoć potencijalnoj i/ili identifikovanoj žrtvi trgovine ljudima u tom slučaju. Ovi sastanci se održavaju u nadležnoj regionalnoj kancelariji SIPA-e, a u skladu sa saglasnošću direktora Državne agencije za istrage i zaštitu BiH (SIPA).

Po organiziranom/održanom sastanku užeg tima imenovani predstavnik regionalne kancelarije dostaviti će informaciju o zaključcima sa održanog sastanka, Odsjeku za borbu protiv trgovine ljudima.

Istovremeno članovi užeg tima u skladu sa nadležnostima i institucijama koje su ih imenovale u regionalne monitoring timove razmjenjivati će informacije sa članovima širih timova, odnosno o prikupljenim informacijama od članova širih timova obavještavati će Odsjek, te na taj način unaprijediti aktivnosti vezane za razmjenu podataka.

### **Prikupljanje i razmjena informacija**

Aktivnosti praćenja stanja trgovine ljudima obavljaju se u skladu sa razvijenim sistemom izvještavanja i prikupljanja podataka o žrtvama trgovine ljudima.

U cilju realizacije aktivnosti u vezi sa izvještavanjem i praćenjem stanja trgovine ljudima, te istovremenim adekvatnim obezbjeđivanjem podataka, kreirani su jedinstveni obrasci za prikupljanje podataka o potencijalnim i/ili identificiranim žrtvama trgovine ljudima koji se popunjavaju/dostavljaju, sa određenim pratećim obrascima. U cilju izbjegavanja dodatne viktimizacije žrtve trgovine ljudima i postupanja u njenom najboljem interesu, ovaj obrazac je podijeljen u skladu sa nadležnostima svih institucija uključenih u aktivnosti borbe protiv trgovine ljudima.

Jedinstveni obrazac za prikupljanje podataka o potencijalnim i/ili identificiranim žrtvama trgovine ljudima, kojeg popunjavaju/dostavljaju za sve nadležne institucije, identičan je u općem dijelu koji se odnosi na identifikacijske podatke o žrtvama i identifikaciji i pomoći, dok se u

posebnom dijelu obrasca razlikuje. Sve navedeno poduzeto je u skladu sa nadležnostima institucija i u cilju izbjegavanja reviktimizacije žrtve. S obzirom na navedeno, usklađeni su sljedeći setovi obrazaca:

1. Jedinstveni obrazac za prikupljanje podataka o potencijalnim i/ili identificiranim žrtvama trgovine ljudima, kojeg popunjavaju/dostavljaju nadležne agencije za provođenje zakona, tužilaštva i Služba za poslove sa strancima
2. Jedinstveni obrazac za prikupljanje podataka o potencijalnim i/ili identificiranim žrtvama trgovine ljudima, kojeg popunjavaju/dostavljaju mjesno nadležni centri/službe za socijalni rad
3. Jedinstveni obrazac za prikupljanje podataka o potencijalnim i/ili identificiranim žrtvama trgovine ljudima, kojeg popunjavaju/dostavljaju nevladine organizacije, sigurne kuće i ostale institucije koje identificiraju potencijalnu žrtvu trgovine ljudima (obrazovne, zdravstvene i druge institucije).

Popunjeni obrasci se dostavljaju Ministarstvu sigurnosti BiH/Odsjeku za borbu protiv trgovine ljudima u zatvorenoj koverti ili putem kurira.

Pored Jedinstvenog obrasca, Odsjeku za borbu protiv trgovine ljudima potrebno je dostaviti obrazac kojim se daje pristanak na obradu ličnih podataka i izjavu o povjerljivosti podataka o predmetima trgovine ljudima u BiH. Obrazac kojim se daje pristanak na obradu ličnih podataka treba imati potpis žrtve trgovine ljudima ukoliko se radi o punoljetnoj žrtvi, dok za maloljetnu žrtvu ovaj obrazac potpisuje staratelj (roditelj ili staratelj kojeg je postavio centar za socijalni rad). Izjavu o povjerljivosti podataka o predmetima trgovine ljudima dostavljaju samo nevladine organizacije, i to potpisano od strane ovlaštenog lica i ovjerenu.

Uz Jedinstveni obrazac je pripremljena Instrukcija za popunjavanje u cilju lakšeg popunjavanja i dostavljanja podataka.

U cilju bržeg i djelotvornijeg dostavljanja podataka, dovoljno je da nadležni CSR dostavi Odsjeku za borbu protiv trgovine ljudima potpisan i ovjeren obrazac kojim se daje pristanak na obradu ličnih podataka.

U svrhu pripreme izvještaja/informacije o stanju trgovine ljudima u Bosni i Hercegovini, a koji/a se upućuje Vijeću ministara BiH, dostavljanje podataka se obavlja dva puta godišnje Odsjeku za borbu protiv trgovine ljudima u pravilu.

Dostavljanje informacija o potencijalnim i/ili identifikovanim žrtvama trgovine ljudima dostavljaju se putem jedinstvenih obrazaca po obavljenoj asistenciji potencijalnoj i/ili identifikovanoj žrtvi trgovine ljudima.

Obzirom da je u prilogu jedinstvenog obrasca potrebno dostaviti prateće obrasce, prilikom smještaja žrtve trgovine ljudima u sigurnu kuću, ove obrasce potrebno je da dostave predstavnice nevladine organizacije koje asistiraju odnosno obezbjeđuju smještaj žrtvama trgovine ljudima.

U prilogu jedinstvenog obrasca, potrebno je dostaviti kopije sljedećih zahtjeva/dokumenata/obrazaca:

- zahtjev za smještaj u sigurnu kuću,
- rješenje o postavljanju privremenog staratelja ukoliko se radi o maloljetnim žrtvama trgovine
- obrazac kojim se daje pristanak na obradu ličnih podataka
- izjava o povjerljivosti podataka o predmetima trgovine ljudima u BiH



## **Finansiranje aktivnosti RMT**

Finansiranje aktivnosti regionalnih monitoring timova (RMT) usmjerenih ka sprečavanju i pružanju pomoći žrtvama trgovine ljudima provodit će se iz sredstava budžeta države, entiteta i lokalnih zajednica, kao i međunarodnih donacija u cilju implementacije Državnog akcionog plana (DAP).

Ukoliko je moguće ostvariti saradnju predstavnika regionalnih kancelarija Državne agencije za istarage i zaštitu BiH, odnosno predstavnika imanovanih u RMT sa predstvanicima nevladine organizacije iz nadležnog RMT-a preporučljivo je aplicirati međunarodnim donatorima u svrhu realizacije zajedničkih aktivnosti.